

PAPIAMENTU

A. Maduro

Mi ta referí na e artíkulo tokante ortografia fonologiko ku señor Mario Dijkhoff a publiká den KONTAKTO ANTIANO di novèmber/desèmber 1979.

- (1) Tokante e digrafo 'gh' ku señor M.D. ke introdusí lo siguiente: Nos ortografia por skirbi 'hal' (pasobra na Kòrsou nos no ta pronunsiá e 'g' velar sordo den e palabra akí) i 'gang' (pa motibu ku ta trata di un palabra ku nos ta adoptá intakto di ulandes; un parti di nos pueblo ta bisa: koredor). E mes un kos ta konta pa: gal-blaas.
Pa 'egho' nos tin 'eko', pa sghreft nos tin: skref o schrift, pa sghuif: skeif o schuif. Si 'j' "sosialmente" no ta aseptabel, e dígrafo 'gh' muchu menos.

- (2) Konsonante 'y' ta aseptá mashá tempu. Si kambié pa 'j' i tene cuenta ku loke M.D. ta proponé den (1), anto bo ta bin haña e siguiente monsturonan: ghotá, ghoja, ghojeria, ghuego, ghuguete, ghugo, en bes di: jota, joya, joyeria, juego, juguete, jugo i tur loke introdusí di idioma spañó ku tin 'o' i 'u' den e promé sílaba. Introdusiendo e dígrafo 'gh' i konsonante 'j' en bes di 'y' nos ta kompliká e ortografia mas. Ke men: sali fo'i panchi, kai den kandela.

- (3) O.K., nos ta laga e palabra 'si' afó i e frase ta keda independiente di esun anterior. Pa e tres palabranan: skèr, fuèrte i tèr no bal la pene preokupá tantu.
Mi ta di akuerdo pa laga aksènt grabe afó den e promé sílabanan (esaki tabata tambe mi proposishon, ma komishon a rechasté), pero pa manten'é den e último sílaba. Manera ta konosi, papiamentu tin gres desinensia 'er':

1. kamber hòmbèr peper koper bòter loper èter
2. kamper solder poler flakter sòrter parker henter (Kòrsou)
3. kòmper komèr frizjidèr brazier afèr kinikintèr henter (Aruba).

Pa evitá pronunsiashon inkorekto ta deseabel pa hasi distinshon, poniendo aksènt grabe (`) riba e palabranan ku ta menshoná bou di 3. Nan ta poko. Biniendo bèk riba loke M.D. ta proponé pa uso di aksènt skerpí, nota ku tur e palabranan ku ta menshoná bou di 2 lo mester haña aksènt. Sigun M.D. lo mester skirbi antó: kampér, soldér, polér, flaktér, sòrtér, parkér, henter. Ke men ku di un banda M.D. ta eliminá uso di aksènt (grave), pero di e otro un banda e ta introdusí uso

- (4) Loke nos a fiha ta di akuerdo ku ortografia fonológiko. Ora bo tende 'b' i 'd' den pronunsiashon, anto bo ta skirbi nan.
- (5) Ta di komprendé ku mi no por ta di akuerdo ku e regla akí. En bes di redusí, e ta oumentá konsiderablemente uso di aksènt skerpí. Siguiendo e regla akí, mester pone aksènt riba tur palabra skerpí ku ta terminá ku: ak am an ap ar as ash - el en er es et - if ik il in ir is it - ok ol os - ul un up us.
Djis pa ilustrá esaki, un ehemplo di kada:
kodák ahám kaptán ganáp abatuár kalbás sutásh papél sostén soldér inglés konkrét abliíf polítik sívil mashín lamír felís permít konoflók (Aruba) kontrol matrós kashikúl algún shalúp yalús.
Hasi un prueba mas ekstenso i lo bo yega na un otro porsentahe.
- (6) Mester tene cuenta ku e echo ku na Kòrsou nos ta bisa inkonfundiblemente: shentióhentiseis (ku 't'), dos mil kuatershentinobentium (ku 't'), seis mion sheteshen mil ochoshen (sin 't').
- (7) Trinteseis, kuarentedos. E forma ku 'e' ta un realidat. No por neglishá loke un gran parti di pueblo ta bisa. Tokante nòmbernan geográfiko. Ami personalmente no tin nada kontra eliminashon di e alternatiba ku ta menshoná bou di C.
- (8) No ta eksistí ningun opheshon pa agregá: mi no a bai- mi n' bai, etc. E idea no tabata pa menshoná tur elishon i kontrakshon.
- (9) Ningun palabra ku tin rípitishon eksakto no tin zonido o entonashon igual. Den: maron-marón, dushi-dushi i pata-pata, e promé parti tin elebasyon di bos. Den kachikachi, pegapega i wiriwiri t'e do dos parti tin elebasyon di bos. E guion proponé pa M.D. ta redundante i ta krea un rompekabesa mas.